

Als ob er dar zu wer geboren  
Das durch in wurd vil wyns verloren  
Vnd er wer eyn täglicher riff  
Der ghört wol in das narren schiff  
Dann er zerstört vernunfft vnd synn  
Das würt er in dem altter inn  
Das im würt schlottern kopff vnd hend  
Er kürtzt syn leben vnd syn end  
Eyn schädlich ding ist vmb den wyn  
By dem mag nyeman witzig syn  
Wer freud vnd lust dar inn im sücht  
Eyn druncckner mēsch gar nyemās rüht  
Vnd weiß keyn moß noch vnder Scheit/  
Vil vnkeusch kumbt vß trunckenheyt/  
Vil vbelß ouch dar vß entsprincket/  
Eyn wiser ist / wer syttlich drincket/  
Noe möcht lyden nit den wyn  
Der inn doch fand vnd pflanzet in/  
Lotth sündt durch wyn zur andern fart/  
Durch wyn der touffer köppfet wart/  
Wyn machet vß eym wysen man  
Das er die narren kapp streiffet an/  
So Israhel sich füllen wol/  
Vnd inn der buch was me dann vol/  
So syngen sie zu spyelen an  
Vnd müsten do gedanzet han/  
Gott gbot den sūnen Aaron  
Das sie syn soltten wynes on/  
Vnd alles das do truncken macht  
Des priesterschaft doch wenig acht



*Handwritten marginal note in a cursive script, possibly a library or ownership mark.*